



Bentiaraq Ottosen
Atassut

UKA 2024/57
22. oktober 2024

Namminersornerullutik Oqartussani, Kommuninilu nunatsinni tjenestemandit pillugit Inatsisartut Inatsisaata § 55-ip imm.1-ip allangortinneqarnissaanut tunngasumik nalunaarusioqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaaliornikkut nunatsinni tjenestemandit, danskit naalagaaffiata nunatsinni tjenestemandinut malittarisassai malillugit tjenestemandisut soraarnerussutisiaqalersinnaaleqqullugit, taamaattorli tapeqartitsisoqassalluni soraarnerussutisiaqaataasussanit aningaasarsianinngaaniit %-mik aaliangersimasumik angissusilikkamik, taamaaliornikkut nunatsinni, qallunaat nunaannilu tjenestemandit soraarnerussutisiaqarnikkut assigiinngissutaasup nalimmassarneqarnissaa anguniarneqassalluni. Naligiinngissutaasoq nalimmassarniarlugu, tapeqaataasussap qanoq annertutiginissaa aammalu kommuninut, namminersorlutillu oqartussanut qanoq aningaasatigut naleqassanersoq nalunaarusiami UKA25 sioqqullugu tunniunneqartussami ersarissarneqassaaq. Tamatumuungattaq ilanngullugu nunatsinni qassit, tjenestemandinut isumaqatigiissut naapertorlugu atorfinitsinneqarsimanersut nalunaarusiami ersarissarneqassaaq.

(Inatsisartunut Ilaasortaq Peter Olsen, Inuit Ataqtigiit)

Suliap aallartinneqareersimasoq Naalakkersuisut oqaatigaat, periarfissalli atugarineqartut eqqarsaatigineqartariaqartut isumaqarpunga. Tjenestemand-it Qallunaat Naalagaaffiatuulli atugassaqtinnissaat, soorunalimi apeqqutigineqarsinnaavoq ilumut tulluartsuusersoq nunatsinni. Pissutsimmi piviusut qivialaariartsigit, aali Atassut oqaatigineqartartoq Danmarkimut ataniaanartutut sooq Danskit inatsisaat ilaarlugit nunatsinnut inatsisiliutissavagut? Tassa taanna apeqqut ersarissaq oqaatigaara. Atugassarititaasut nunatsinni immitsinnut aallaavigaluta ingerlanissarput pisariaqannginnami?

Tjenestemand-it Danmarkimi imatut soraarnerussutisiaqarmata uagut aamma ilaarlugit taamatut soraarnerussutisiaat eqqutiinassanerpagut? Ilaa eqqaamalaarsiuk soraarnerussutisiat pillugit aaqqissuuseqqikkatta susoqarpa? Inuiaqtigiit kiffaangissusiirlugit pisoqarpoq. Taamatut aamma aaqqissuuseqqittoqassanerpa?

Atassummiit allaanerussutigilluinnakkatta ilagaat Naalagaaffeqatigiinnermut illersuisuulluta, inatsisit ilaarlugit ingerlatsiinassagaluarutta immitsinnut tulluartsuusersut inatsisiliornavianninnatta.

Atassummiit inuiaqatigiit katitigaanerisa pillugu inuk qitiutillugu pingaartitatut oqaatiguarparput, tamannali aamma Naalagaaffeqatigiinnerup aqqani katitigaanerup Kalaaleq aamma Qallunaaq pilersitaammat.

Uani pineqartoq eqqarsaatigalugu nalunngilarput ukiorpassuannortuni anguniarneqattaartartoq, kisiannili suna assigiinngissutigaa soraarnerussutisiaqaleruma pisartagakkalu taamaaginnarunik? Kisianni tassa oqaatigissavara Atassummiit isumatusaarluta oqariartuutigaarput Kalaaleq aallaaviussaaq uani inatsimmi.

Namminersorneq pillugu inatsit nunatsinnut eqqunneqarnikuuvoq, tamanna pillugu malittarisassiunneqarnikuuvoq Kalaallit immitsinnut aallaavigaluta periarfissinneqarpugut inatsisiliussalluta. Tamanna Atassummiit aamma sulissutigerusulluinnakkatta ilagaat, inatsisit Danmark ilaaginnarlugu suliaqannginnisarput. Immitsinnut aallaavigisariaqarnerput uani pingaaruteqarpoq.

Naalakkersuisut allannguutissatut siunnersuutaat taperserparput, tamannalu ataatsimiititaliamut susassaqartumut innersuupparput. Taamatullu apeqquterpassuit ataatsimiititaliap suliarilluartariaqarpai.